

Naqqiut

(Aningaasaqarnermut Siunnersuisoqatigiinnut innersuussummik ilanngussisoqarpoq teknikkikkullu aaqqiissuteqartoqarluni)

Inuit amerliartuinnartut Nunarput qimassallugu aalajangertarnerannut suut tunngavilersuutaasinnaaneranik innuttaasullu ikiliartuinnarnerat mumisinnissaanut suut iliuuserineqarsinnaanerannik Naalakkersuisut UKA2017-mut saqqummiunneqartussamik sukumiisumik nalunaarusiornissaannik Inatsisartunut aalajangiiffissatut siunnersuut.

(Inatsisartunut ilaasortaq Sara Olsvig, Inuit Ataqtigiit)

Akissuteqaat

(Aningaasaqarnermut Aatsitassanullu Naalakkersuisoq)

Siullermeerneqarnera

Aalajangiiffigisassatut siunnersuut Naalakkersuisut qujassutigaat.

Nunamut allamut nunasisarnermut kiisalu inuit amerliartortut nunatta qimannissaanut aalajangertarnerannut suut tunngavigineqartarnerisut nassuiarniarlugit, siunnersuummik Naalakkersuisut sukumiisumik nalunaarusioqquneqarput. Kiisalu ingalassimaarinninnissamut suleriaasissaasinnaasunik ujarlertoqassaaq, ineriartornerlu tamanna qanoq ingalassimaarneqarsinnaanersoq siunnersuutunik saqqummiussisoqarluni.

Siunertaq tamanna Naalakkersuisut isumaqatigilluinnarpaat. Nuttariaatsit kiisalu nunatsinnit nuttarnerit pillugit ajornartorsiutit aqqitassaasut Naalakkersuisut ukkataraat, tamakkulu nassuiarnissaannut suliaqarnertik aallarereerlugu.

Aningaasaqarnermut Siunnersuisoqatigiit 2013-mi nalunaarusiamini nunasisarnerit nuttartarnerillu pillugit immikkut misissueqqissaarsimapput. Tamatumunnga atatillugu inunnik Kalaallit Nunaanni inunngorsimasunik Danmarkimiittunik kisitsisitigut erseqqissaasiortoqarluni teknikkikkut tunngaviusunik oqaaseqaammik suliaqartoqarsimavoq. Misissueqqissaarnerup ilaatigut takutippaa, ukiorpassuarni Kalaallit Nunaannit nunamut allamut nuttartoqarsimasoq, Kalaallillu Nunaanni inunngorsimasut Danmarkimiittut amerlasuut Kalaallit Nunaanni ilinniagaqarnerup qaffasissusaanut naleqqiullugu, ilinniagaat qaffasissuusut.

Aningaasaqarnermut Siunnersuisoqatigiit nalilerpaat, nuttartarnerujussuaq tamanna ”brandrain”-imik (ilinniarluarsimasut pitsaanerusementik atugaqarumallutik nunanut allanut nuuttarnerat, nunamut pineqartut ilinniarnissaannut aningaasaliisimasumut annaasaqaataasumik) ersersitsisoq. Nuttartarnerujussuaq aningaasaqarnermut imminut napatissinnaanngitsumut ersiutaavoq, pissutaanani. Aningaasaqarnermik imminut napatissinnaasumik pilersitsinissamut aaqqissuusseqqinnerit suliniarnerillu aamma siunissami nuttartarnerit allannortinnissaannik kinguneqarsinnaasut naatsorsuutigineqarpoq.

Tamatumunnga tunngatillugu tallimangorneq 6. maj-imit 20. maj-ip tungaanut Naalakkersuisut voxpop-imik misissuissapput internettimi apeqquutit akisassatigut. Tamatuminnga anguniagaavoq, inuit Kalaallit Nunaanni nunanilu allani najugaqartut akissuteqarnissaat. Misissuinerup siunertaraa, sunik peqquteqarlutik nuunnissamut imaluunniit nuunginnissamut inuit namminneq suut nassuiaatigineraat paasiniassallugu. Misissuineq nuuttarneq.gl-imi aamma flytning.gl-imi nassaarineqarsinnaassaaq.

Misissuinermit maannakkut ingerlasumi inernerit siulliit, Nuna tamakkerlugu pilersaarusiamut nassuiaammi 2016-imi, UKA2016-imi saqqummiunneqartussami ilanngunneqassapput. Nuttariaatsit nuunnermullu pissutaasartut sukumiinerusumik annertunerusumillu misissorneqarnerannut atatillugu voxpop-imik misissuineq misissuinerit siullertut, tunngaviliisutullu isigineqassaaq. Nuna tamakkerlugu pilersaarusiamut nassuiaat 2016 Inatsisartunit suliarineqareerpat misissuineq annertunerusoq aallartinneqassaaq. Misissuinermit annertunerusumit inernerit Nuna tamakkerlugu pilersaarusiamut nassuiaat 2017-imi ilaassasut pilersaarutaavoq.

Nuttariaatsit tamatumunngalu pissutaasut Naalakkersuisut paasiniaallutik aallartereernerat tunngavigalugu, Naalakkersuisut isumaqarput immikkut nassuiaasiornissaq pisariaqanngitsoq. Taarsiullugu Naalakkersuisut siunnersuutigaat, allannguutissatut siunnersuut tulliuuttoq akuerineqassasoq:

”Inatsisartut aalajangiiffigisassaattut siunnersuut: Nuttarnerit nunanullu allanut nuuttarnerit pillugit sukumiisumik Naalakkersuisut misissueqqissaassapput. Misissueqqissaarnerup inernerit Nuna tamakkerlugu pilersaarusiamut nassuiaat 2017-imi, UKA2017-imi saqqummiunneqartussami ilanngunneqassapput”

Naalakkersuisunit taamatut oqaaseqarlunga aalajangiiffigisassatut siunnersuut Inatsisartunit suliarineqarnissaanut ingerlateqqippara.